

صرخة نبض

أشعار بالعامية المصرية



شعر

أميرالأمم / سالم جاد سالم

صرخة نبض ...

شعر

سالم جاد سالم

صرخة نبض
شعر / سالم جاد سالم
تصميم الغلاف للفنان / أحمد فريد
برعاية سلسلة إصدارات
" دليل المبدعين العرب "
ت / 01061635162
رقم الإيداع:
الترقيم الدولي:

إن الآراء الواردة في هذا المصنف لا تعبر بالضرورة عن آراء
وتوجهات الناشر وإنما تعبر عن رأي المؤلف فقط

يمنح نشر أو نسخ أو ترجمة هذا المصنف أو جزء منه بأي وسيلة
تصويرية أو إلكترونية أو ميكانيكية بما فيها التسجيل
الفوتوغرافي والتسجيل على أشرطة أو أقراص مضغوطة أو أي وسيلة
نشر أخرى بما فيها المعلومات واسترجاعها بدون إذن كتابي من
المؤلف طبقاً لقانون حماية الملكية الفكرية رقم ٨٣ لسنة ٢٠٠٢
والقوانين المماثلة لها

الإهداء

إلى ...

أبى وأمي وزوجتي رحمهم الله

إلى ...

أولادي الأعزاء

وإلى ...

كل من له اثر وتر كذكرى جميلة بحياتي

إلى ...

كل أهلي الطيبين البسطاء إلى كل شاب مصري وعربي

طموح إلى نشوة القلب

بنبض قلبي اهدىكم حروفي البسيطة

الشاعر

سالم جاد سالم

مفتحم

حين اللقاء كل يوم بمخدعي انفر بقوة لعل تهدأ مواجعي

كأن نارا تلتهب بهشيم اقوى من اللهب

يا ليت محبوبي هنا يأتي جواربي ويلتحم

صرخة نبض _____

حلم الحنين ...

انا كل ليله بنكمش

زي العيال البردانيين

واقفل كفوفي بدمعتى وقت الحنين

ابكى الألم وبا الجراح ويا الأنين

اصرخ بصوت مكتوم بخوف

ف عز صحوه القلب الحزين

اسرح بفكري وانشرد

عن كل اه تصرخ سنين

من زاوية الحيطه الشمال

جمب السرير فيه شرخ مسدود

فيه فتحه تحت على اليمين

حسيت بنور وبصيص امل

جى من بعيد

فتحت عيني بنص عين
خفت ابخلق .. يطلع لي
عفريت الليل اللعين
سمعت صوت دندنه بتعزف
ألحان بالأمل
مديت إيديا .. أمسك حسيت بالندم
طلع شبح م الجنس الناعم الأمين
خدني ف إيديه وبنيت معاه
أحلام وقصر وبستان حياه
وراح وتاه
يا حلم تايه من زمن
عايش ف قلبي من سنين
روحت فين؟
روحت فين؟

صرخة نبض _____

ممس الجنين ...

يا همس جاني
وانا صاحي
صحيت كثير أوي
من عشقي وجراحي
لمست ليه الوجد
فيا وانا صاحي؟
فتحت ليا الأمل
وحاجات كثير راحت
يا شوق تغلغل أوي
فينك من اجراحي
همسه ف نظره وكلمه
حسيت روى راحت
هيمن أعد الحنين
واحساس ونظرة عين
وأنين ما بعده أنين
وأهات وتنهيده
حقيقى أوي بعيده
يا همس جاني وانا صاحي
أمانه ضد أوي جراحي

صرخة نبض _____

تخاريف...

بيقولوا تخاريف
وربيع العمر أهو عدا
وجه الصيف
ولا عشان النبض ضعيف
ولا العمر دا راح ف الزيف
وبعد ربيعه نظره خفيف
بيقولوا تخاريف
ليه يعنى يزورنى البرد
ف عز الصيف
ولما القلب يحن ويعشق
تاني يبقى رهيف
ولا الإحساس اللي بيعانى
دا يعنى نحيف
كلها تخاريف
ما هو بعد ربيعك يجى
خريف ويهل الصيف
ف مره حلمت باتى عريس
ولبست البدله

وراحت أبص لاقيتني
غريب
الشعر السايح راح لبعيد
وبكل ملامحي بقت تجاعيد
وأخذنى الفكر
قعدت أفكر
ياااه
دا عدا القطر
وفاتنى وحيد وراح لبعيد
طب إيه لازمتهها
القلب يدق ويعمل فيها
إنه سعيد
النبض بيعلى
وحنان واشواق
واحساس مشتاق
وفضلت أحط ف برفان حلو
واسرح باقى الشعر
يا دوب تخاطيف
وأخبنى مرايتى

وعامل فيها كأنى سعيد
وصحيت من نومى
كدا مبسوط
وكأنى ف عيد
واخذت علاج الضغط
بسرعه
وحبة سكر أصله عنيد
وضحكت بقوه
بصهوه صوتى
وفجأه لقيت الكحه الصعبة
بتخنق فىا
كانت هتطلع روحى
ما هو أصلى نسيت
قرص الحساسيه
وبطلت احلم
أو افكر تانى
لا ربيع ولا صيف
ولاحتى خريف
كلها تخاريف

حلم المسا...

حلم على ضي القمر
فارد جناحه ف السما
فرحان بيحلم بالهنا
غازل نجوم الليل
بضحكة ونظرة مبسمة
راسم على كفه أمل
ونجوم محاوطة ع القمر
أحلام وسارحة في الخيال
عاشق ومحروم من زمان
وليله طال غاب الصباح
واحلام كثير
وافراح بتلمع ف الفضاء
وفجأة راح
حلم المسا
وجه الصباح
بضباب وغيم
وكأن ليله كان طويل
وصبح عويل
وكله راح
كله راح

صرخة نبض _____

نبض الحنين

من بين
كل آلامى
من نبض
القلب النازف
م الحرمان
من بين الشوق
الساكن بالوجدان
من بين أنين الصمت
القابع حولى
بكل مكان
من عزف الناي الغارق
بالأشجان
بأنين أنين الصرخه
بداخل قلبى العاشق
من بين سطور
الشعر الدافئ
من بين حنينى

وبين أجواء الصيف

الحارق

وما بين رياح

شتاء صاعق

تعلأ بقلبي

بكل أوان

تزهي بعيني

تعلو أكثر

كالنسمات

يهفو عطرك

طيفك ... ظلك

بالخيالات

انى بعشقى

اتووه ساعات

أحلم أكثر

م النبضات

أحلم أكثر

م النبضات

سحر العيون ...

بص خد تعالى
قرب هنا منى
بص ف عيونى
قرب كمان عندى
ايوا كمان منى
خلىنى اشوف العيون
والسحر جار منى
ايوا كدا كفايه
والله عاجبنى
عاشق انا ليهم
والعشق قاتلنى
من ننى جواهم
بحوره بعيد عنى
وبياض بيكسيهم
وفيه دايره م الننى
واشواق جواهم
وشوق مجننى

ورموش كدا معاهم
بالشوق تغالنى
وابتسامه خفيفه
مرسومه بل ملئى
وبريق فتان
مصحوب مع الننى
عيون بتحكى الغرام
وعيونه قتلاتى
اتمنا بس اشوفها
وتكون قريب منى
ادعو معايا وقوولو
يارب صبرنى
معلش سامحونى
كان حلم قريب منى

خاطرة السعادة ...

إرسمى خيوط السعاده
إبنى لى ف قلبك عياده
لقتينى بالشهاده
دوبينى م الغرام
أصل حبك بقا عاده
كان موصلى
من زمان
ليا جرعه ع الوساده
وواحد تانيه
لما بصحى
م المنام

صرخة نبض _____

حلم تاه في الزحمة ...

رسمت بعيني ضحاياه
وورده وزهره ومرايه
فتحت قلبي للعنينا
صالحت الحزن بأسايا
ضمدت جراح كذا بقلبي
وقلت أعيش بقا كفايا
لاقيتني بحلم كان منسي
وشمسي بتطلع بضحايا
وقمري ف ليلي كان مخفي
ونجمه حلوه بسمايا
وتاه الحلم مع الضحكه
واختفت شمسي
ونجمي أصبح كذا حكاياه
رجعت انوح كذا وابكي
بحسره وهم
وجرحي بينزف جوايا
بدل الدموع بيبيكي بدم

وزاد الحزن على حزني
وفجری جه على صبحي
وتوهت ف عز افراحي
انوح وابكي على جراحي
يا فرحه عمري كان بدري
لا عدت عارف صبحي من فجرى
وتاه عصرى مع قدرى
وهقعد اعد ايامى
يوم يجرى ورا التانى
وراح الحلم واتبخر
وكل العمر دا مقدر
واهى احلام تراوضى
هتفضل ذكراها بقلبي
واخر العمر بقيت وحدى
كأن الفجر كان لحدى
وحفر ف حفره كان قبيري

صرخة نبض _____

نظرة عين ...

شافتنى جى من بعيد
نظرتها حاده بشىء عجيب
بس قالت كلمتين
إنت مين؟
وسط حيره من عيونها
كشفها كل الحاضرين
رديت عليها بشوق ولهفه
وعيون حزاننا مخنوقين
أنا الماضي أنا كل السنين
شوفت فيها انكسار
وعيون بتدمع وعرق مالى الجبين
توهت منها وتوهتنا
نظرة طالت بين عيوننا
تحكى هى واحكى انا
وكل رمشه من عيوننا
بدمع غالى
وكل آلام الحنين

والشوق ما بينا
وبسمه هاديه
ورمش عين
بس قالت كلمتين
إنت مين؟

شبح الخيال ...

كأمره أحلم بطيفك
يسرق الحلم بعيونى
كأمره أحلم وأشوفك
ضحكه حلوه ف عيونى
تشعل القلب بحنانك
تبهر الروح بالجمال
نفسى مره تكون حقيقى
تهدى اشواقى وظنونى
كأمره أحلم وأشوفك
بس لما تنام جفونى
نفسى مره بس اشوفك
وتفتح عيونى
أحس بيك عايش معايا
تشقى أوهام الخيال
تطفى نار الشوق بقلبى
ولا مكتوب بس اشوفك
حلم أشبه بالخيال

صوخة نبض _____

ساحرتي ...

معلش سامحونى مسحور انا بيها
معرفش اكتب يا ناس الشعر غير ليها
هى ملهمنى وكلماتى كمان ليها
ف عيونها سحر وجمال سبحانه باريتها
وصوتها كمان جنان برقه مافيش زيها
معلش سامحونى عاشق انا ليها
يابنت يالى قصدانى اكتب كمان فيكى
والله ظلمانى بكل معانيكى
ما اقدرش اقول فيكى
بكره يجيالك نصيبك ويكتب كمان فيكى
معدور وقلبي متيم بعشوق خلانى
ما شوف غيرها بس هى اللي ساكنانى
فيها عبير الورد وفيها ألحانى
عاشق ليها أنا ابوا بقول تانى
هى الحياه والأمل لكل أيامى
هى الحنين والحب اللي سرقتة أيامى
معها بس الأمل وكل وجدانى

بس كلامها عجب و عيونها سحرانى
ليها مسكت القلم وليها هقول تانى
يا بنت يا ام العجب ليه جتيلى انى
صحيتى فيا الوجع وسنين حرمانى
معلش سامحينى واعذري لسانى

صرخة نبض _____

حلمي تايه ...

حلمى تايه من سنين
صاحبى قالى كلمتين
انت مين؟
فضلت تايه ف الورق
فكري شرد
ما اعرفش ليه حالى انقلب
ع الطاولة دى شوية ورق
وكتاب ومصحف وصوره
عندى من سنين
وعيون حيارى محتارين
شمال يمين
والم وفكره بتتولد
وسط الحنين
وصرخه جوايا بائين
اكتب شوياء ع الالم
وسطر منهم للحنين
وقصيده حلوه للبلد

واحلم واطير

تقول سفير

ارجع واركز ف الهيام

واشوف بعين الحالمين

يمكن ياواد

تصدف معاك

وتبقى بيرم أو جاهين

واكتب واعيد

وامسح أكيد

واسجل حروفي من جديد

بهيام وشوق

ولهفه مخنوقه بآلم

واحلم واطير فوق السحاب

عاشق وحالم ف الضباب

وان قولنا آه

ممكن نعيش وشويا نبقي مستورين

نصعب كتير ع الشحاتين

ما معانا حق الرغفين
سيجاره دين
وباكو شای بجنهين
ورغيف وجبنه م المش القديم
وافكار كتير
واحلام تطير
هو دا حالنا الضنين ادباء وشعرا مثقفين
وزى ما احنا مصممين
راضين بحالنا ومبسوطين

ذكرى الحنين ...

يا ذكرى ساكنه

بالحنين

يا قلب تايه

من سنين

ان قلت اغنى

أقول لمين؟

للزمن

ولا السنين

ابكى جرح

ونبض قلب

ودمع عين

يا ذكرى ساكنه

من سنين

اشكى مين؟

صرخة نبض _____

السراب ...

يا اللى قلبك
مش مطاوعك
ليه بترضى بالعذاب
هو ليه الحظ عاند
قافل ف وشك ألف باب
كل ما تقول ياللا هانت
تلقى أيامك عذاب
ليه كل حلم أحس
ف نهايةة السراب
يعنى خلاص
قفلت بيانها
ولا خلاص القلب
داب
يا اللى قلبك
مش مطاوعك
ليه بترضى بالعذاب

صرخة نبض _____

القدر ...

كنت شاب ف صغر سنى
حلمى أكبر م الخيال
فرحان للدنيا بغنى
وبجري فيها يمين شمال
وكان معايا حلم عمري
شايله ف الناحيه الشمال
بسمع نبضه جوا قلبى
كان حقيقى شىء محال
قصه أغرب م الخيال
كان ساكنى
حلم غالى جنب منى
واحلامنا فوق الخيال
بيت وأسره
وفرحة فينا بتحاوطنا
خلت كل الناس تغار
حلم لساه جوا منى
حافظه أكثر م الكتاب

والقدر كان غدره أكبر
والحياه بقيت عذاب
وحلم عمري
راح وتاه وسط
توهه من السراب
والقلب حاير
بين حقيقه وبين سراب
توهت ياما بين بلاد
وبين عذاب
ولسه شايل
جوا قلبي
حلم وشوبه عذاب

صخرة نبض _____

صخرة نبض ...

يا اللي كنت جنب منى
ومحسنى بالأمان
روحت فين فيه ف بالى

100 سؤال

قلبي واجعنى بحرقه
وعقلى شاتت تاه كمان
إحساس بحصره م العدم
هو ليه زولك خايلنى
كل ما أغمض عيونى
ألاقى طيفك جنب منى
نظرة العين الحزينه
دمعة نازله بنار بتكوي

جوا منى

حتى والأشواق دفينه
جوا نن العين بعيده
ليه إحساسي تعبنى
هسألك بس سؤال
ليه بوحت بالحنان
كنت متهنى بحالى

ببكي آه مرار وغلب
حرمان وقهر
بس كان القلب خالى
ليه يا حظ كدا معاندنى
يوم ما احس الفرحة عندى
فجاءه تهرب وتعاندنى
يا اللى شاغل بالى قولى
انت عايش إيه حصلك
قلبى متقطع عليك
الحنين ما زارش قلبك
طب عيونك ليه خدتنى
من حياتى وتوهتنى
ليه ياعشق العمر جي
بعد ما راح منى كل ضي
قلبى متحطم بحرقه من الألم
ليه فايتنى وحدى أبكى م الندم

زمن الطيبين ...

مش باقى منى
غير شويه دمع ف عنيا
جو نن العين واقفين
جوا عيني مخنوقين
نزيف الم وجراح سنين
جوا قلبى لسه هناك
ماكنهم موجدين
وذكريات وحاجات كمان
فوق الحاجات الموجودين
وكأني بنحت بابره جوا
كومه من الحجاره محجرين
احلام سراب متسرسين
بسراب خيال وخيال مريض
من لىالى الشقيانين
يا عم جمعه مال عيونك حزناتين
ومال كفوفك مرعوشين
جسمك هزيل

بعيون بتدمع زي سيل
حالك عجيب
محتاج طبيب
فين بهيه ام العيون مكحلين
ضحكتها حلوه
لها صوت زي الرنين
هي فين
فين ناسنا الطيبين
او عاك ياخال تقول كلام
مال ومال برج الحمام
ويا وابور الطحين
لسه دمع العين بينزف
زي السواقى النعيانين
على ناس زمان الطيبين
على احلام الصبا
على حلم ضاع ورا السحاب
وسط الضباب بسنين عذاب

وكل باب له ألف باب

م المقوليين

مش باقي منى

غير شوية دمع بعنيا

محتاج رغيف ولا رغفين

يسد بيه جوع اليتيم

جنبة من وحي السراب ...

لا تستهين بقلب أدماه الألم
بحنين مدفون من زمن
كل اللي شافه حكم عليه
احساس وحاسه
بس شافك مش مرايته
شايل حمول ف القلب
محتاجه لديوان
وكلام كتير فوق الكلام
إوعاك يا قلب تحن تانى للحنان
إوعاك تنن بأنه مصحوبه بندم
صبرت ياما وطال صبرك م العدم
إوعاك تنوح على حد خان أو استهان
إحساس وحاسيته انا
ما اعرفش ليه خاني الأمل
والحلم دا كان كابوس
لما دعكت ف الفاتوس
طلع العمل

جنيه بايديها النعم
بعيونها دى نظرة خجل
قالت يا إنسي يا منحوس
راح افك لك انا العمل
فضلت تحاور ف الكلام
واشواق ولهفه باهتمام
وألم وحسره م الزمن
لفت دماغى
وتوهت ف سحر الجمال
وقلت ايوا
هى ديت بالتمام
يلا يا واد هم واركب الحصان
شدت لجام وحلفت
على كل اللي فات
يمين طلاق وبالتلات
ودفنت اوجاعى بأمان
وفرحت من كتر الآلام

وعيونى حرمت المنام
وفضلت اكتب للهيام
واحساس وشوق ويا الغرام
وارجع لحلمى من زمان
الاقيه بأوصافها تمام
أحن للشوق والأمل
واعشق أوي
وعيشت أحلى ايام الزمن
وكانت حقيقى م العجب
حلم وحلمته من زمن
وظلع عمل
مربوط على فرع الشجر
إن هزه ريح اظير معاه
والاقيه بأوراق الشجر
يروى العليل ويهيم كتير
فرحان بنفسه وبعشقه الكبير
واصرار ورغبة متبته

متحكمه ف كل اللي خاب
حالك عجب يا دى العجب
أصبحت ليه كلك عدم
من كتر ما شافك تعب
ولا دى رغبه من زمن
ربك كبير يحكم عليك
حكم السنين زى العمل
مربوط على فروع الشجر
الكل شافه وقال عجب
الكل شافه وقال عجب

صرخة نبض _____

فرحة ...

فرحه يا سارحه وسط الغيظ
قلبك وجعك م التخبيط
عارفك جامده قويه وصلبه
عشتى حياتك واقفه وشايله
بعد ما مات الواد عتريس
شقيتى كثير ع الأولاد
بس يا فرحه ليه متضايقه
إيه احوالك واللي جراك
كتر الهم مشقلب حالك
ولا العيشه غاليه شويا
قولى يا بنتى و ما تخبيش
الواد عواد راح الجيش
بكره حيرجع لابس ميري
وشكله قيافه
من بعد البلغه
ولبس سيديرى
حيبقى قيمه وحاجه عظيمه

طاب محمود ما بعثش جواب
مع حماد
جه امبارح من بغداد
جاب مروحه وكمان توب بفته
وكام كلسون وشيرز
وحته صوف ل ابو حماد
وحرام كحلى ل خالتك زاهيه
بكره حيجي وتفرحى بيه
قلقانه ليه ردى عليا
جرالك ايه
عيونك دامعه ومخنوقه ليه
عملتى الكحك بتاع الورده
وجيبتى التمر عشان العيد
ألا قوليلى جوزها صحيح
اخباره ايه
الزرعه بتاعتك كيف محصولها
ولا بقرتك مالها

قولى يا فرحه
ردت قالت بعيون دامعه
وتنهيده غامقه
العمده بعثلى الواد مخلوف
قال بعتوله كام مكتوب
وترنك بصوت مخنوق
عواد يابو نعسه
اول يوم ساعه المغرب
وهو بيخطر ويا اصحابه
قتلو الواد
وهو هناك حدا البوابه
كان بيدافع عن احبابه
هناك ف ال سينا ببير العبد
بلبس الميرى
وقالوا يا فرحه ابنك مات
استشهد يعنى؟

كان بيدافع عن اراضينا
فادى زاميله وفرقعوا فيه
قنبله جامده وغدرم بيه
قالو ارهاب
اعمل ايه يا ابا عبتواب
جنسهم ايه دول الارهاب
دينهم ايه
مايفرقوش بين الأعراب
ماشافوش لبسه
شكله ملامحه
ماعرفوش يعنى انه مصري
ولا دول ملهوش كتاب
حرقه بقلبي قايد نار
فرحه قرب كان ف العيد
بعد حصاد القمح
جهزنا الحاجه

وحددنا له معاد الفرح
حتى القاعه ويا الطشت
وحله نحاس وسرير حلو
من ابو عمدان
والناموسيه م الدبلان
اقولك ايه بس يا فرحه
ابنك راجل
جدع شهم
اسمه ماماتش
عايش حى
عريس ف الجنه بعون الله
على الصوت زغرتى ياله
باركى الفرح ودخلته حلوه
بيوم الجمعه
عز الضهر ف يوم رمضان
بس يا خال قالوا اشلاء

جابو الجزمه وفرد شراب
ويا الكاب
بدل الفرحة بعنوا لى عذاب
منهم لله الإرهاب
منهم لله الإرهاب

صوخته نبض _____

درويش ...

أنا قلبي الأخضر كان طائر
بجناح مكسور
وكأني بغنى لعصفوره
وبنات الحور
فرحان بالدنيا وإظهارها
وبكل النور
فرحان بالزرعه اللي بتطلع
وحصاد ووابور
مبسوط بالناس الشقيانه
وعراقها بحور
وبشوف الضحكه المليانه
بطبق بنور
وقلوبهم صافيه وراضياته
وزاغريت وظهر
ودى حنه نعاسه وعريستها
فرج ابو دبور

والزرعه اهي خلصت بسلامه
وعلقنا النور
وجنينا كثير وكثير
ياما وزاد المحصول
ورجعت ابص لسمانا
هيام وصابور
اتأمل ملك الرحمن
وكأني داير بجنوله وطار
فرحان وبقول
درويش وزاهد ف الدنيا
وخادتني بحور
عديت وسافرت كثير ياما
صليت ف القدس اللي منور
زيتونه الأخضر والأسمر
واشجار التين
ولبست حرامي وقلت اعبر
بالمره وازور

الكعبه اطوف واسعى
واشرب من بيرها ظهور
وغسلت الجسم المتهالك
من كل ذنوب
سواح ف الدنيا ومتدروش
وكتافى عليها م الزحمه
طابور
واخذنى السعى على الخضره
وصليت ف مقام النبى طه
و دعيت بدموع
للىستر ولكل الأمه
وتزول الغمه ونتصالح
مع بعض وتصفى لقلوب
وانا كل ما ابص لسمانا
احس بنور
وافتكر الحلم بصبايا
وجناحى مكسور

إحنا أصحاب القرار ...

ابن خال العم خال
قطعوننا ألف حته
قطعوا علينا ألف سكة
بهدلوا حتى الجاكته
لبسونا توب مقطّع
مترقع من خير شبابنا
لسه فيها خير ولادنا
عارفين مين اللي غاصب
مين م الأساس مالهومش مله
احنا انصار العروبه
احنا اصحاب القرار
احنا آمنّا بموسي وعيسي
ونبينا محمد هاديننا
مهما تغتصبوا ف ارض
مهما تهتكوا ألف عرض
كل يوم يولد ف بيتنا
ألف ألف من الرجال

أم محمد و أم مينا
أم سرحان جالها خال
من سلاله بيت مهند
تبقى خالته أم بلال
لما كان العم خال
هبحرروا الاقصي بايديهم
أصلهم أولاد رجال
بكرة يجى
وترفر فر فوق الماذن
رايه الحق وتعلى
باسم الله حامينا
وباسم محمد نينا
عارفين الرعب اللي فيكم
نظره الطفل اللي فينا
ترهب الحاخام بتاعكم
حرفوا ف الدين وقولوا
حرفوا تاريخ بلادكم

لسه وعد بلفور
بندرسه لولاد ولادنا ول ولادكم
فاكرين يوم الهزيمة
لما جبنا ساس قراركم
لما ركعتم بين ايدينا
لسه ايوا هناك ف سينا
والقتال تشهد عليكم
كل حبه رمل فيها
طهرناها من ايديكم
قطعوا مهما تقطعوا
بكره هنقطع ايديكم
مشلولين من يوم ما جيتم
وابتديتم
دقه النقص اللي فيكم
ملعونين ف كل مله
والتاريخ يشهد عليكم
وكل يوم يولد ما بينا
ألف ألف م الرجال
ألف ألف م الرجال

صرخة نبض _____

جيل محدود ...

يا حيل اتهد
قلت اصحى
ف يوم م الفجر
اشقى اتعب واهد الحيل
عشان بالليل
انام واتهد
لقيت قلبي متوهنى
ف حجات ما تهد
جبال ياما بأحزانه
تهد السد
وراح النوم يدا عبنى
وعينى تقفل برمش الحد
وصحوة الأشواق فيا
ماعايزه تهد
نبض النبض تا عبنى
وعايز حد
صعب بجد

الحيل يتهد
ما بيتهد ولا يرتد
عن الصحوه بعشق الند
توه ياللاف احلامك
وأوهامك يا قلب اشتد
وشد الحيل اللي ما بيتهد
قلت اصحى بصحوه فجر
عشان اتهد
ما فاده حد
يا حيل اتهد

صرخة نبض _____

فاتنتي ...

هامستى بالعيون
رغم بعد المسافات
نظرة طالت بين عيوننا
تحكى عن معنى الالهات
مره شوق وحنين ولهفه
وتانيه بتجمع شتات
احيت الحياه بقلبي
رجعتلى الذكريات
الامل ويا الحنان
والرقه فيها حكايات
كل رمشه من عيونها
احس انى جوا منها
وكل نظره من عيونى
بتحتضنها
بس نظره
جمعتنا واهدت
القلب بثبات

لو حكيت عن كل
نظره بشوق ولهفه
مايكيفها ١٠٠ كتاب
همسة العين اللي جوا
جوا نن العين بقوه
بحر تانى من الحاجات
هى بس اللي بعيونها
كل ماضى حاضر وأت
بس يكفى انك تشوفها
تنسى اسمك م الحياه
للممات
تشعل الأشواق بنارك
تهدى كل البسمه دارك
تسهل الضحكه بقلبك
زى خيل البر تجرى
ف الفضاء بدون ثبات
هامستنى بالعيون
رغم بعد المسافات

الليل و الذكرى

أنا والليل والذكرى
واحساسي بيوجعني
أشواق ونار تكوى
وأنين بالروح بيألمني
وحروفي معاناتي
وقلمي حالف باليمن
ما يطعني
والله جوا من الألم
ساكنه بتوجعني
أمانه أمانه
يالليل بكره ماتظلمني
أنا وحروفي ومحبوب باع وغدرني
ف دايره مقفوله
وسؤال دايم على لساني
وخانقتي
ليه وليه
وكام ليه جي ورا التانيه
بتسألني
وكل ذكري وحنين بالقلب ظالمني
أمانه أمانه أمانه
يالليل بكره ما تتعبنى

صرخة نبض _____

سن القلم ...

سن القلم مكسور

خربش بكراستى

يلف الزمان ويدور

أرجع بذاكرتى

لايام كدا عدت

مرت بمخيلتى

سن الطفوله زمان

وانا لسه بتعلم

امسك قلم وكتاب

اشوف انا حكايتى

كنت يا دوب لسه

بادي ء كدا أحبى

مفتون بزھوتها

فرحان أوي بشكلى

لف الزمان ودار

جرحنى وجرحته

أخذ كثير أوي منى
وخادته على راحتته
كتبت ياما دموع
والالام مع أوجاعها
ما شفت انا منه
غير ناس قلت كدا ف راحتى
ورجعت أكتب كلام
انكسر منى سنه بكراستى

السايح التايه ...

أنا السايح أنا التايه
بين الأحلام
انا اللي الزمن خدنى
ورا الأوهام
كثير أحلام بعيش فيها
وارسم كل أمانيتها
واتوه واعشق ظلام ف ظلام
يا ميت ليليه كدا عدت
وما بان النهار فيها
يا شمس يا غايبه بعيد عنى
وقمر مخنوق ف لياليها
يعنى بغنوه مخنوقه
وقلبه حزين من الضيقه
يا عود دندن قسم الحانك
يا ناى هادى
بصوت كروان بيحلاك

اعزف كمان قولى
سمعنى رنين الصوت بأشجانك
قلبى عليل منى
وكل أحلامى بشرياتك
بنبض النبض يطربنى
ف عز الآه تدوينى
واعيد تانى وأقول ياللا
يارب يسعد أيامك
غايب بعيد وسايبنى
أعد نجوم ف أحلامى
أنا السايح أنا التايه
مابين الهجر وحرمانك

صُرِّفَةُ نَبَضٍ _____

إِسْمٌ مَيِّنٌ ...؟

القضية مش قضيه

كرسي فوق

أو بمنصب أو وزير

القضيه

ان اللي بيحكم ف المصير

كم هايل م ال.....

روحت يوم اكتب كتابي

طلعولى

اللي يفحص و اللي يسال

واللي يخلق ألف حجه

واللي يبرر كلامه

ان اسم الأم ناقص

همزه من تحت الضمير

بعد غربه وسنين عذاب

رجعونى ع الحصير

كلها قوانين تعقد

واختراع يمصوا بيه دم الفقير

وبعد واسطه وبعد دوخه

وبعد تمرير الكثير

قالوا يعني اسم امك
لوعاوزه يكون خطير
نكتبه هيفا و لا نانسي ولا مين؟
قلت أمى أم سعد
هو دا أحسن كتير
هو فين بس الضمير؟
وابتديت اتعب واكافح
من جديد
رخصونا وضيعوا تعب السنين
جاتلى بنت قلت كرمك يا كريم
رزق جى تكون معين
طلعت اجرى لجل اسجل اسمها
ويكون صحيح
دوخونى تانى دوخه
زى صينية الفطير
هات لنا اوراق تقول
ان امها كات بنت مين؟
وستها مولده فين؟

وسننوني من جديد
طلعو اسلاف ابونا
زهقونا ... ضيعونا
استنزفونا ... شردونا
أصلكم أولاد.....
ارحموا ابو اللي جابنا
ملعون جناب الشياطين
اللي يخترعوا ف مهازل
ويقطعوا توب الفقير
هنلاقيه بس فين
هو احنا من جنس تانى
ولا انتم أولاد سفير
ارحموا الناس الغلابه
ارجموا راس الحقير
غيروا قوانين وسنوا
ألف ساطور م الكبير
اللي يتكلم يا موتوا
هيقطعوه زي بيتزا م الحجم الكبير

المشكلة الكرسي الجميل
والله خايفين يطير
بيخترعوا لاختراعهم ١٠٠ دليل
و ١٠٠ دليل
لجل ما يذلوا الفقير
هي كانت بنت مين؟
إسمها فيه غمزه
من تحت الضمير

صِرْخَةُ نَبِيٍّ _____

ما تيجي يا صاحبي

ما تيجي يا صاحبي

نحل القضييه

ونعمل تعاهد

بروح الانسانيه

ونكتب أغاني

كتير عاطفيه

حنان واشواق

وحاجات م اللي هيا

ونصالح قلوبنا

بالطيبه الهنيه

ونضحك بصوت

طفولتنا البهيه

تعالى يا صاحبي

إيدك بإيدى نغمض عيوننا

ونحلم ببكره ونعشق ماضيها

ونحيي بقلوبنا الحب اللي فينا

ونركب يا صاحبي حصان الخيال
فاكر ياغالى ايامنا زمان
طفولتنا الجميله ويا الدراسه
وعمك جمال
ابوضحكه خفيفه
ونظرة عيونه
لما نسرق منه الطعام
يخبى ف عيونه
ويقولك خد كمان
وخالتك صفيه
بتاعت الخضار
وصوتها الجميل
ساعه الصباح
وغناوى العصاري
وقعدتنا الجميله
ف لحظه صفانا
واحلامنا الكثيره

وصوت السواقي
تنعى بهدوء
تعالى يا صاحبي
نعيش ف الخيال
نحلم ونفرح وننسى الخلاف
حقيقي يا عمري انت اللي باقى
وحبى اللي ليك
من نار اشتياقى
بحبك يا صاحبي
وبدعيلك كمان
تفضل معايا لآخر الزمان

التعريف بالشاعر

الاسم / سالم على جاد محمد سالم من قبيله السوالم بمصر
اسم الشهرة / أمير الألم .. كما أطلقه علي الشاعر الكبير
طلال السعيد
مواليد / ٢٠ / ٥ / ١٩٧١ . قرية بطيطة . محافظه كفر الشيخ
(كفر المبدعين)

المهنة / مصمم ديكور وتنسيق ألوان . عضو نادي أدب
كفر الشيخ . حاصل على الكثير من شهادات التقدير
بالمسابقات والأمسيات

إنسان بسيط أعاني ما يعانيه البسطاء، إنسان ريفي
أعشق الريف بكل معانيه وجماله وهدوئه وناسه الطبيعيين

الفهرس

المحتويات

٥ حلم الحنين
٨ همس الحنين
١٠ تخاريف
١٤ حلم المسا
١٦ نبض الحنين
١٩ سحر العيون
٢٢ خاطرة السعادة
٢٤ حلم تاه ف الزحمه
٢٧ نظرة عين
٣٠ شبج الخيال
٣٢ ساحرتي
٣٥ حلمي تايه
٣٩ ذكرى الحنين
٤١ السراب
٤٣ القدر

صخرة نبض
صحوۃ نبض ٤٦
زمن الطيبين ٤٩
جنية من وحي السراب ٥٣
فرحة ٥٨
درويش ٦٥
إحنا أصحاب القرار ٦٩
حيل مهدود ٧٣
فاتنتي ٧٦
الليل و الذكرى ٧٩
سن القلم ٨١
السايح التايه ٨٤
إسم مين ...؟ ٨٧
ما تيجي يا صاحبي ٩٣

صِرْخَةُ نَبِيٍّ _____



كتبت بيت الشعر
عبرت عن الافعال
ناجيت ليالي السهر
ببوح ما عمره انتقال
أبكي حنين الفراق
ومر صبري طال
ليلة أغني
وليلة أقول موال
خاطرة ف كلمة غزل
والشوق بتاعي جبال
يا بنت يا ام العجب
ليه غيابك طال؟
سهران اعد نجوم
ونجمي غيابه طال
إمتى يحين اللقاء
واسعد أنا بالحال
أشوفه عندي هنا
واغزله بايدي شال
وابوسه من وجنته
واحسن عمري طال



01061635162